

LISTOVI GRAČANIČKOG KALENDARA OD 24.11.2011. DO 16.5.2012.

24. 11. 2011.

U PISKAVICI OTKRIVENO SPOMEN-OBILJEŽJE
POGINULIM BORCIMA I ŠEHIDIMA ODBRAMBENO-
OSLOBODILAČKOG RATA 1992. – 1995.

Sedam branilaca s područja ove MZ dalo je svoje živote za odbranu BiH. Njihova imena ispisana su na spomen-pločama ovog biljega slobode: Gopo Ismet, Alić Hazim, Spahić Ibrahim, Hrvić Omer, Avdija Suad, Hrvić Fadi i Hrvić Sadmir. Da se pamte i nikad ne zaborave... To je simbolika i poruka za generacije koje dolaze.



24. 11. 2011.

34. SJEDNICA OV: NACRT BUDŽETA ZA 2011., ODLUKA O ZADUŽENJU ZA NOVE PROJEKTE

Odluka o davanju saglasnosti Općinskom načelniku da može kod komercijalnih banaka izvršiti zaduženja Općine za realizaciju kapitalnih projekata, bez sumnje je najznačajniji akt u mandatu ovog saziva Općinskog vijeća. Usvojenom odlukom stvorene su realne materijalne pretpostavke da se počne sa realizacijom već usvojenog plana kapitalnih investicija i Strategije razvoja Općine do 2020. godine. U tim dokumentima su utvrđeni glavni i prioritetni projekti, koji će se finansirati iz različitih izvora, između ostalih i iz kreditnih zaduženja Općine. Budući da su već otplaćeni neki raniji krediti, od početka 2012. godine, Općina je budžetski sposobna da sklapa nove kreditne aranžmane. Usvojenom odlukom predviđeno je zaduženje kod komercijalnih banaka u iznosu od 2.200.000 KM, na 5 godina i uz grejs period od 6 mjeseci. Iz ovih sredstava financirat će se ili sufinansirati sljedeći projekti: pokrivanje Sportske dvorane na Bazenu, most kod Šumarije u Gračanici, put Gračanica – Lendići–Kamenolom, te izvršiti sanacija Doma kulture (BKC-a). Od ostalih infrastrukturnih projekata na terenu, predviđena su ulaganja u projekte vodosnabdijevanja u Malešićima, Babićima, D. Orahovici, Vranovićima, D. Lohinji, Lukavici i Škahovici. U samoj Gračanici predviđa se rekonstrukcija vodovodne mreže i asfaltiranje puta Lipa, te sufinansiranje asfaltiranja Ulice Branilaca Kule grada. U finansiranju projekata vodosnabdijevanja, predviđeno je i učešće gra-

đana (i iz drugih izvora) sa 20%, od čijeg će obezbjeđenja zavisiti dinamika povlačenja sredstava i realizacije tih projekata.

27. 12. 2011.

IZBOR SPORTISTE OPĆINE GRAČANICA ZA 2011.

Na ovoj manifestaciji koju tradicionalno organizuje Sportski savez općine Gračanica za *najboljeg sportistu* proglašen je Nermin Kadic, član NK "Bratstvo" Gračanica, dok je *najbolja sportiskinja* Edina Kulić, članica Ženskog odbojkaškog kluba (ŽOK) "Gračanica"; *najbolji ženski sportski kolektiv* je ŽOK "Gračanica" a *muški NK "Bratstvo"*. *Najuspješniji trener* je Nusret Muslimović, takođe iz NK "Bratstvo"; *najuspješniji sportski radnik* je Mujo Hasić, predsjednik NK "Mladost Malešići. Posebnu nagradu za *Životno djelo* u oblasti sporta dobio je Općinski načelnik Nusret Helić, *posthumno priznanje* za sve ono sto je za života dao svijetu gračaničkog sporta dobio je Fikret Konjić Učo, a nagrada je uručena njegovom sinu Dini Konjiću.

U ostalim omladinskim kategorijama *najuspješniji junior* je Osman Hasić, član NK "Mladost" Malešići a *juniorka* Emina Jukan članica ŽOK-a Gračanica; *najuspješniji kadet* i *kadetkinja* su Mensur Žepić, član KK "Gračanica" i Aida Mujić, članica ŽOK-a Gračanica. Za *najbolje pionire* proglašeni su Dženita Omerasević, članica karate kluba "Lavovi" i Rijad Nedić, član KK "Gračanica". (prema izvještaju Radio Gračanice)

28. 12. 2011.

35. SJEDNICA OPĆINSKOG VIJEĆA GRAČANICA: USVOJENA ODLUKA O PRIHVATANJU KREDITA EVROPSKE INVESTICIONE BANKE (EIB) U IZNOSU

**OD 4.450.000 KM ZA REALIZACIJU
DIJELA PROJEKTA "VODOOPSKRBA I
SANITACIJA U FBiH", KOJI SE ODNOSI
NA PODRUČJE GRAČANICE**

Uz prijavu za učeće u ovom projektu, Općina Gračanica je još prije dvije godine prosljedila odgovarajuću projektnu i drugu dokumentaciju za cjelovito rješavanje pitanja vodosnabdijevanja i kanalizacionih sistema na području općine. Nakon odgovarajućih procedura, te serije razgovora i monitoringa, Evropska investiciona banka, prihvatila je dostavljenu projektne prijedloge i odobrila kredit za njihovu realizaciju u visini od 4 450 000 KM, sa rokom otplate od 25 godina i grace periodom od 6 godina. Radi se o vrlo povoljnom kreditu iz kojeg će se finansirati najveći projekat vodosnabdijevanja i zbrinjavanja otpadnih voda u historiji Gračanice. Dinamika realizacije i povlačenja ovih sredstava utvrdit će se posebnim setom konkretnih izvedbenih projekata, koji se u vrlo kratkom roku moraju dostaviti kreditoru. Usvajanjem ove odluke obim Budžeta općine Gračanica za 2012., povećan je sa 13.561.000 KM (koliko je bilo planirano u Nacrtu), na 15 473 000 KM, što je i potvrđeno jednoglasom odlukom Općinskog vijeća. Da li će kreditnim aranžmanima sa komercijalnim bankama, koje je Vijeće prihvatilo na prethodnoj i zaduženjima kod Evropske investicione banke, koje je Vijeće prihvatilo na ovoj sjednici, Općina Gračanica naći u krugu prezaduženih općina u BiH? Odgovarajući vijećnicima na ovo pitanje, općinski načelnik Nusret Helić bio je kategoričan: "Uopće se ne može reći da smo time prezadužena općina jer imamo novac kojim

ćemo svake godine servisirati dugove, ali ćemo zato rješavati bez posebnih teškoća veoma važne probleme naše općine." Ovu svoju tvrdnju potkrijepio je i konkretnim pokazateljima.

21. 1. 2011.

**PROMOCIJA PROJEKTA "ETNO
TURIZAM- BOSANSKA AVLIJA" U
GORNJOJ LOHINJI**

Radi se o zamisli i ideji inž. Faruka Širbegovića, vlasnika i direktora kompanije "Širbegović", kojom je prijatno iznenadio ne samo svoje prijatelje već i gračančku javnost, pa i zvaničnike, prisutne na promociji. Iako je to samo početak u vidu jednog manjeg etno-dvorišta u prelijepom prirodnom ambijentu na prostoru Gornje Lohinje, u njemu se već na startu, prepoznaju dvije dimenzije: kao prvo, promocija bosanske kulture i tradicije, kulturnog i prirodnog naslijeđa i kao drugo – samoodrživost projekta, što naravno, nije lahko postići u ovim našim sadašnjim ekonomskim i općim društvenim prilikama. Međutim, optimizam i odlučnost inicijatora ovog projekta, kao i podrška predstavnika lokalne i kantonalne vlasti, javno manifestovana na ovoj promociji, garancija je da će se projekat dalje uspješno dograđivati i konačno, uspjeti.

31. 1. 2012.

**36. SJEDNICA OPĆINSKOG
VIJEĆA GRAČANICA: ELABORAT
"RACIONALIZACIJA POTROŠNJE
ELEKTRIČNE ENERGIJE I
UPRAVLJANJE JAVNOM RASVJETOM
OPĆINE GRAČANICA", IZVJEŠTAJU O
RADU POLICIJSKE STANICE GRAČANICA
U 2011. GODINE , ODLUKA O
OBAVLJANJU VOLONTERSKOG RADA...**

To su tačke dnevnog reda koje su privukle najviše pažnje prisutnih na ovoj sjednici, dok je Izvještaj o radu Općinskog načelnika za 2011. usvojen bez ikakve diskusije. Cilj izrade navedenog elaborata je uvođenje više reda u korištenju, održavanju i daljem razvoju javne rasvjete na području Općine Gračanica. Ovo malo istraživanje pokazalo je sa koliko se stihije do sada razvijao čitav taj sistem. Posljedice takvog haotičnog razvoja su: neracionalna potrošnja, česti kvarovi, negativan utjecaj na okoliš i loš kvalitet rasvjete. Materijal je pokazao da se uz organizovano korištenje, manja ili veća tehnička unapređenja i poboljšanja mogu ostvariti velike uštede. Za relativno kratko vrijeme, ukoliko se primijene preporuke iz ovog elaborata, moguće je izbjeći redukcije koje su sada na snazi i imati bolju rasvjetu na čitavom području Općine, za isti obim sredstava, ali i značajne uštede. Ove preporuke će se svakako imati u vidu u budućim planovima općinske administracije i mjesnih zajednica.

Iako je usvojen bez ikakve diskusije, vrijedi istaknuti samo neke akcente iz Izvještaja o radu Općinskog načelnika u 2011. godini: "I pored navedenih i drugih problema, ključni ciljevi iz Programa tada Općinskog načelnika za 2011. godinu su realizovani. Učinjeni su neki pomaci u stvaranju boljih uslova i povoljnijeg ambijenta za ostvarivanje prava građana, privrednih i drugih subjekata i ukupno boljeg života građana u lokalnoj zajednici. Uz osuvremenjivanje rada službi i njihovo osposobljavanje da budu istinski servis građana i lokalnog biznisa i u tako pogoršanoj budžetskoj situaciji

više od 1/3 budžetskih sredstava usmjereno je u razvojne projekte, sitnije i krupnije s ciljem da se poboljša život ljudi na ovom području, dok je i 1/3 utrošena za plate i ostale troškove općinske administracije."

04. 2. 2011.

HLADNOĆE I VELIKE SNJEŽNE PADAVINE KOJE NE PAMTE NI NAJSTARIJI ŽITELJI U BIH...

...pogodile su i područje općine Gračanica. Po proglašenju prirodne nepogode od strane Štaba civilne zaštite Federacije BiH, aktivirane su sve komunalne službe i na području općine kako bi se smanjio stepen ugroženosti stanovništva i materijalnih dobara. Obezbjedeđena je prohodnost svih ulica i drugih lokalnih saobraćajnica, te uredna snabdjevenost vodom i električnom strujom, gorivom kao i namirnicama i sredstvima široke potrošnje i u najudaljenijim područjima općine (osim u MZ Škahovica i D.Orahovica gdje su bile na snazi redukcije vode). Općinski štab civilne zaštite je uspješno koordinirao sve aktivnosti na općini: javnih preduzeća i ustanova, zdravstvenih institucija, mjesnih zajednica, općinskih službi i drugih subjekata... (zahvaljujući organizovanosti struktura civilne zaštite malo "ledeno doba" ispraćeno je bez težih posljedica na ovom području).

29. 2. 2012.

37. SJEDNICA OPĆINSKOG VIJEĆA: USVOJEN PROGRAM RAZVOJA ZAŠTITE I SPAŠAVANJA LJUDI I MATERIJALNIH DOBARA OD PRIRODNIH I DRUGIH NESREĆA OPĆINE GRAČANICA ZA PERIOD OD 2012.–2016. GODINU...

...te Prijedlog plana upisa u prvi

razred gračaničkih srednjih škola-Gimnazije i Mješovite srednje škole za školsku 2012/13. godinu. Donesene su i odluke o uspostavljanju statusa mjesne zajednice za naselja Lendići i Gornja Lohinja, kao i Izvještaj o stanju klizišta sa finansijskim izvještajem o saniranim klizištima u 2011. godini.

21. 3. 2012.

UMRO VETERINAR BAKIR MAGLAJLIJA

Nakon kraće bolesti preminuo je u tuzlanskoj bolnici, u 65. godini života, a ukopan 24. 3. 2012. godine na gračaničkom greblje "Režići". Nastavljajući stopama svoga oca, veterinara Hasana, vrlo cijenjenog i uglednog građanina Gračanice i Bakir je uživao ugled vodećeg stručnjaka na regiji Tuzla, jedno vrijeme bio je na čelu Veterinarske stanice u Gračanici. Bio je čovjek širokih interesovanja, poznat u gračaničkoj organizaciji izviđača i ljubitelja prirode, drugovao je sa lijepom knjigom, a nalazio vremena i za slikarstvo—sve za svoju dušu. Mnoge Gračanije prijatno je iznenadio svojom prvom, nažalost i posljednjom likovnom izložbom, koju je priredio 1. marta ove godine u Bosanskom kulturnom centru u Gračanici.

Bio j to njegov posljednji poklon svojim drugovima prijateljima i svom rodnom gradu.

29. 3. 2012.

38. SJEDNICA OPĆINSKOG VIJEĆA GRAČANICA: U ZNAKU IZVJEŠTAJA O IZVRŠENJU BUDŽETA I RADU I FINANSIJSKOM POSLOVANJU NEKOLIKO JAVNIH USTANOVA U 2011. GODINI

Ostvareni Budžet za 2011. godinu iznosio je 10.024.172 KM, što je 86,54 % od planiranog. Prihodi iznose

9.089.435 KM ili 90,97% od planiranih (porezni 6.558.919 ili 98,81%, neporezni 1.986.361 ili 93,78% i primitci 934.737 ili 58,75%). To znači da je ostvarenje Budžeta u 2011. godini manje za 1.559.828 KM u odnosu na plan. U skladu sa ostvarenjem Budžeta, manji su bili i rashodi (za 19,59% u odnosu na plan, a 10,65% u odnosu na 2010. godinu). Ipak nije došlo u pitanje finansiranje osnovnih funkcija lokalne uprave i takozvanih vanjskih korisnika, a nisu stvorene neke nove obaveze i zaduženja, pa su ga vijećnici jednoglasno usvojili.

Kako je i uobičajeno, izvještaji o radu i finansijskom poslovanju javnih ustanova – Bosanskog kulturnog centra, Dječjeg obdaništa i Centra za socijalni rad nisu pobudili pažnju vijećnika i usvojeni su gotovo bez diskusije. Treba ipak istaknuti da su date pohvale Centru za socijalni rad, koji je u ovim kriznim vremenima u potpunosti ostvario svoju funkciju.

Nije puno pažnje pobudio ni izvještaj o procijenjenoj šteti od prirodne nepogode – snijega i niskih temperatura na području općine Gračanica u periodu od 4. 2. do 22. 2. 2012. godine. Prema podacima koje su nadležne komisije prezentirale u ovom materijalu, ukupno procijenjena šteta iznosi 119.428. KM, do čega na objektima poljoprivredne djelatnosti 24.400 KM, na vodovodnim instalacijama 27.340 KM, na ostalim objektima 2.500 KM, te troškovi na otklanjanju posljedica nevremena 65.188 KM.

31. 3. 2012.

POSLOVANJE KOMPANIJE "ŠIRBEGOVIĆ" U 2011. GODINI

Ova vodeća kompanija u BiH u obla-

sti građevinarstva ostvarila je prošle godine profit od milion KM, što se smatra zadovoljavajućim rezultatom s obzirom na tešku situaciju na tržištu, posebno u građevinskoj branši u kojoj zbog nedostatka posla veliki broj firmi bilježi gubitak ili su otišle pod stečaj. Kompanija je više od 70% prihoda ostvarila na inostranom tržištu, što upotpunjuje podatke o uspješnosti njenog poslovanja u prošloj godini.

Već u prvom kvartalu ove godine Kompanija "Širbegović" realizuje poslove u vrijednosti od 50 miliona KM, pa se očekuju bolji rezultati u ovoj, u odnosu na prethodnu godinu. U posljednje vrijeme otvaraju se mogućnosti za naplatu potraživanja i ostvaruju novi poslovni kontakti sa partnerima u Libiji, a dolaze i pozitivni signali "za nas građevince na domaćem tržištu", izjavio je sa optimizmom za sarajevsko "Oslobođenje" Faruk Širbegović, glavni menadžer i vlasnik Kompanije.

13. 4. 2012.

GRAČANIČKI "KOVAN" – EVROPSKA FIRMA – POTPISAN UGOVOR O DUGOROČNOJ STRATEŠKOJ SARADNJI SA HRVATSKOM FIRMOM "CRO PELET" VRIJEDAN MILION EURA

To je rezultat višegodišnjeg uspješnog poslovanja ove gračaničke firme na hrvatskom tržištu, koja je, kako je prilikom potpisivanja ugovora rekao vlasnik firme "Cro pelet" Ivić Pašalić, evropskim kvalitetom svojih eko peći, ozbiljnošću i odgovornošću postala ozbiljan partner i eliminisala sve ostale konkurente na tom tržištu. "Za nas je posebno značajno, kako reče, potpisujući ugovor, direktor "Kovana" Said Kara-

lić, što se grijanje putem eko kotlova na pelet, sve više koristi u Hrvatskoj i što će ulaskom Hrvatske u EU, na neki način i naša firma biti bliže evropskom tržištu."

Ovo je samo jedan u nizu dobrih poslovnih poteza menadžmenta gračaničkog "Kovana". Samo prije nekoliko mjeseci potpisan je milionski ugovor sa firmom Hg-Eco flame, doo Vitez o izgradnji firme za proizvodnju peleta – koji se uspješno realizuje.

18. 4 2012.

KONFERENCIJA "UPRAVLJANJE KOMUNALNIM VODOVODNIM SISTEMIMA", POD SLOGANOM "VODA ZA ŽIVOT–MISLI, ŠTEDI, ŽIVI".

... održana pod pokroviteljstvom i uz finansijsku podršku Fonda za zaštitu okoliša FBiH u Gračanici, okupila je brojne učesnike, predstavnike relevantnih institucija u Bosni i Hercegovini i pokrenula više pitanja vezanih za racionalnije gazdovanje vodovodnim sistemima i smanjenje gubitaka u vodovodnoj mreži koji se na nivou Bosne i Hercegovine, kako je rečeno, u prosjeku kreću između 40 i 60%. Radi se o vrlo visokim gubicima, koji su posljedica dotrajalosti vodovodnih sistema i neracionalnog korištenja pitke vode kao jednog od najdragocjenijih prirodnih resursa u svijetu. Nisu slučajno organizatori i pokrovitelji ovog skupa odabrali za domaćina Gračanicu i gračaničko JP preduzeće "Vodovod i kanalizacija", koje je posljednjih godina postiglo izvanredne rezultate na smanjenju gubitaka vode u mreži i u tom pogledu prepoznato kao vodeće u BiH. Zahvaljujući višegodišnjim naporima menadžmenta i uprave, na čijem je čelu mr. Fuad Alić, što se tiče gubitaka vode

u mreži, gračanički vodovod se približio evropskim standardima. Zato Gračanica odavno, pa ni prošle hidrološki jako sušne godine, nije imala redukciju vode. To su, zapravo rezerve s kojima raspolažu mnogi gradovi. Zato su iskustva gračaničkog vodovoda, koja su prezentirana na ovom skupu, izazvala veliki interes učesnika i svakako, bit će od koristi mnogim sličnim vodoopskrbnim sistemima u BiH.

26. 04. 2012.

39. SJEDNICA OPĆINSKOG VIJEĆA: U ZNAKU "PRIVATIZACIJSKIH" ODLUKA JP "KOMUS" I IZVJEŠTAJA JAVNIH ZDRAVSTVENIH USTANOVA

Vijećnici su bez šire rasprave usvojili Odluku o proglašenju dobrom u opštoj upotrebi više nekretnina i zemljišta, koje će se upisati u katastar nekretnina, a Općinski sud u Gračanici, Zemljišnoknjižni ured, izvršiti njihov upis u zemljišne knjige kao javno dobro. Članom 5. ove odluke, ta se dobra povjeravaju na korištenje i upravljanje JP "Komus" Gračanica na osnovu posebnog ugovora koji će se zaključiti u roku od 90 dana od dana stupanja na snagu te odluke. Ugovorom će se regulisati način upravljanja i korištenja tih nekretnina. Radi se o ispravljanju proceduralnih i drugih grešaka u postupku privatizacije ovog preduzeća, prema nalogu nadležnog suda. Tako će se na osnovu ove odluke izvršiti iskunjavanje tih dobara iz početnog bilanca preduzeća, sa kojim se ušlo u proces privatizacije. U tom smislu, početni bilans preduzeća ispravio bi se "sa datumom 30. 6. 2001." Na ova usklađivanja odnosi se i Odluka o davanju saglasnosti na korigovani početni bilans JP "Komus"

Gračanica – pravni sljednik JP "Komus" d.o.o. Gračanica, koju je Općinsko vijeće usvojilo bez diskusije. Time su stvoreni uslovi za konačnu konsolidaciju JP "Komus" prema nalogima Agencije za privatizaciju i nadležnih sudova.

Gotovo bez rasprave usvojeni su izvještaji o radu i finansijskom poslovanju javnih zdravstvenih ustanova za 2011 godinu: Opće bolnice "Dr. Mustafa Beganović" i Doma zdravlja. Usvojene su i dvije informacije: o higijensko-epidemiološkoj situaciji i o stanju vodosnabdijevanja na području općine Gračanica u prošloj godini, sa prijedlogom mjera.

13. 05. 2011.

PETNAESTI FESTIVAL DJEČIJEG TEATRA BIH U GRAČANICA - ZA NAJBOLJE SCENSKO OSTVARENJE PROGLAŠENA JE PREDSTAVA "APOKALIPSO", TEATARSKI KOMAD IZ OŠ "ČENGIĆ VILA" SARAJEVO.

Na teatarskoj sceni Bosanskog kulturnog centra u Gračanici u toku dva dana trajanja festivala na sceni Bosanskog kulturnog centra u Gračanici svoje teatarsko umijeće predstavili su mladi osnovnoškolskog uzrasta iz 11 bosanskohercegovačkih gradova (Sarajevo, Zenica, Banja Luka, Tuzla, Mostar, Teslić, Bugojno, Žepče, Srebrenik, Maglaj, Viskoko i domaćin Gračanica.) Organizator Festivala je Bosanski kulturni centar Gračanica uz podršku Općine Gračanica, Ministarstva obrazovanja, nauke, kulture i sporta Tuzlanskog kantona, Federalnog ministarstva kulture i sporta, te Fondacije za muzičke, scenske i likovne umjetnosti.

Žiri u sastavu: Ljubica Ostojić, Biljana Anđelić (predsjednik) i Bogdan Simić, dodijelio je sljedeće diplome i priznanja:

GRAPOS EXPO 2012



Međunarodni sajam poduzetništva i obrta

16-19.05.2012

grapos-expo



U.D. BOMS-EXPO
75324 Stepan Polje-Gračanica
e-mail: ut.boms@gb.net.ba
www.graposexpo.com.ba

tel./fax: ++387 35 783-042
fax: ++387 35 792-344
mob.: ++387 62 343-328

Za uspješan višegodišnji rad sa djecom Nevenki Rodić, Dječiji studio glume "Roda" Banjaluka; Za muzički element u predstavi "Ukradeni princ", Katoličkiškolski centar "SV. Pavao" Zenica; za ostvarenje lutkarskog scenskog izraza u predstavi "Basnosplet" Dječije pozorište "Eko Art" Bugojno; za interpretaciju uloge prosjaka u predstavi "Neka nova djevojčica sa šibicama" glumcu Irfanu Ferizoviću, Teatar "Fedra" Bugojno; za interpretaciju uloge lane Mirni Hodžić i uloge malog lava Sandro Dostici u predstavi "Mali lav i mala antilopa"; za ansambl igru u predstavi "Bajka o čarobnom sviraču" Dječije kazalište Doma kulture "Franjo Kovačević – Francika" Žepče; za umjetničko pedagoško vodstvo Amini Begović u predstavi "Dobro drvo" Dječiji teatar "Bambino", Centar za mlade Sarajevo; za najbolju kostimografiju u predstavi "Dvije čajne žličice

prašine" OŠ "Hasan Kikić" Gračanica; za uspješnu dramaturgiju kratke priče u predstavi "Mali lav i mala antilopa" OŠ "Sveti Franjo" Tuzla; za savremeni pristup klasičnoj bajci u predstavi "Neka nova djevojčica sa šibicama" Teatar "Fedra" Bugojno; za interpretaciju uloge ružno pače u predstavi "Ružno pače", Prva OŠ Srebrenik; za najbolje scensko ostvarenje predstave "Apokalipso" OŠ "Čengić Vila" Sarajevo.

16. (do 19) maj. 2012.

**TREĆI MEĐUNARODNI SAJAM
PODUZETNIŠTVA I OBRTA "GRAPOS-
EXPO 2012" GRAČANICA**

Nakon stečenih iskustava u organizaciji prethodna dva, pa i izvjesnih konceptijskih i organizacionih lutanja, treći sajam je najbolje uspio i po broju izlagača (okupio je 268 firmi iz Bosne i Hercegovine, Hrvatske, Slovenije, Francuske i Srbije, od kojih je 65 s područja Gra-

čanice) i po besprijetkornoj organizaciji, posjeti i pratećim sadržajima nadmašio sva očekivanja. Općina Gračanica kao glavni nosilac organizacije Sajma, javnim pozivom odabrala je firmu "Boms expo", kao izvršnog organizatora (koja se već dokazala u organizaciji ovakvih sajamskih priredbi), pored obezbjeđenja lokacije (poslovna zona "Širbegović"), stimulisala je učesće preduzeća s područja općine Gračanica na taj način što je za te firme uplatila 15% cijene zakupnine izložbenog prostora na Sajmu. Ovu sajamsku priredbu finansijski su podržale i vlade Federacije i Tuzlanskog kantona putem svojih resornih ministarstva

Sajam je organizovan na 6.000 kvadratnih metara zatvorenog i 15.000 kvadratnih metara otvorenog prostora. Privukao je pažnju mnogih poslovnih ljudi

iz regiona, predstavnika vlasti, te običnih posjetilaca sa područja gračaničke i susjednih općina.

U konferencijskom dijelu, u skladu sa profilacijom sajma, bilo je govora o prilagođavanju privrede BiH i reperkusijama nakon ulaska Hrvatske u EU, govorilo se o izvorima investicionih sredstava za mala i srednja preduzeća, podizanju kvaliteta proizvodnje, te usluga u ugostiteljstvu i turizmu itd. Poseban "šmek" sajmu dala je i izložba starih i tradicionalnih zanata sa regiona.

Sajam je službeno proglasio otvorenim Damir Hadžić, ministar komunikacija i prometa BiH, a vrpce su simbolično presjekli: načelnik Općine Gračanica Nusret Helić i premijer Tuzlanskog kantona Sead Čaušević.

